



SOKEHS CONSTITUTIONAL CONVENTION

SOKEHS MUNICIPALITY
STATE OF Pohnpei
FEDERATED STATES OF MICRONESIA
96941

2. part

P.O. B.
PHONE

1961

101 Saphtha Street
Delegato Hilary Conrad
President

Del. Kusto Lieman
Vice President

Del. Rensper Liwy
Floor Leader

Del. Felciano Perman
Chairman
Style Committee

Del. Francisco Krielmwo
Chairman
Civil Liberty Committee

Del. Annes Lebehn
Chairman
Government & Resource Comm.

Del. Marculano Kohler
Chairman
General Provisions
&
Transitions Committee

Del. Largo Edwin
Chairman
Procedures Comm.

Convention Secretary
Jusly Frederick

CONSULTANTS
for Bethwel Henry
Judah Johnny

- Del. Teank Artul
- Del. Isidoro Martin
- Del. Pedro Harris
- Del. Annes Lebehn
- Del. Felciano Perman
- Del. Marculano Kohler
- Del. Kusto Lieman
- Del. Damian Soti
- Del. Hilary Conrad
- Del. Largo Edwin
- Del. Magdalena Walter
- Del. Bender Enicar
- Del. Daklo Syne
- Del. Rensper Liwy
- Del. Altarino Rosario
- Del. Swalper Eilam
- Del. Francisco Krielmwo
- Del. Ander Phillip
- Del. Warner Nath
- Del. Richard Susala
- Del. Adarino Rabay
- Del. Abraham Dosei
- Del. Alison Phillip
- Del. Edward Linus

Del. John Walter

REPORT

EN

make new
lay out

STYLE

COMMITTEE

ME PID^D

PAHSONN^{AN} EN

KOSONNEO WET

President
Sokehs Constitutional Convention
Sokehs Municipality
Sokehs, Pohnpei 96941

Maing Mr. President:

Omwi Committee me Koasoane Pwungin Mahsen oh Koasoanpen Ire Kan (Style) me tungoaleniki pwukoah en tehk ni keneinei oh wiada report en ire laud koaros me audehda sapwelimen Wein Sokehs Poahsoan en Kosonned, men peki ahnsou kiset en wia ah tungoal report me pid keimuseklahn petehk-spahl en kamwomwadahn Poahsoan wet.

Omwi Committee kaunopadahr report wet sang ni eh pwurohng tehk ire laud oh ire tikitik koaros ni keneinei opil sang ni sawas oh kaweid kan me omwi Committee patowan alehdi sang wasahn kaweid oh irail soun kaweid teikan, omwi Committee kaunopadahr oh koasoanedier report wet pwehn wia mehn kaweid oh kawehweh ire ieu me pahn pwarada muhr me pid Poahsoan en Kosonned wet.

Report wet kawehweh ire kan nan Poahsoan wet nin duwen ah irekidi nan Poahsoan pahn ehu ehu ire laud.

ME PID KALOHRPEN POAHSOAN WET (PREAMBLE)

Omwi Committee pepehm me nan kalohk wet, epil kasalehda ah wauneki oh pohnese me Kauno Koht me wia poahsoan en mehkoaros me kin wiawi de mwekid koaros nan sampah wet, iei kahrepen pohnese wet ah sansal nan kalohk pen Poahsoan en Kosonned wet. Manaman lap me sansal nan

kalohk wet, ni mahsen en wai, iei "sovereignty" Manaman wet iei
me Poahsoan wet, sang ni menen Ire Tikitik 2 en Ire Laud 14 en
Poahsoan en Kosonned en Weipokon en Pohnpei, kokoukidahr pwe en
katengehdi sang ni enginkehlap, ong Wein Sokehs. Nan kalohk wet
epil pid lepin mahsen "PWAHPWAHLIK" met sohte wia mehn kelingan ehu,
ahpw e kasalehda me iawasa me Wein Sokehs tepisang ie keilahn aio.
Kalohk wet pil pidada lepin mahsen "ENGIN KEHLAP" me wehwehki minimin
pene, ahpw mehlel pepehm me kalohk wet me sonamwahu, pwehki ah
kasalehda ineng oh mour me kin poahsoanehda democratic government ehu.
Democratic government ehu me sang aramas, ong aramas, pwehki aramas,
mehndate ma songesongen poh kan. Aramas koaros ahneki perehreh pahrek
en kosonned oh ahneki manaman en kasalehda ineng me re sohte pwungki
nan arail mour oh government.

IRE ME PID "MANAMAN LAP" (1)

Ire laud me pid manaman lap (Supremacy) koasoanehdi me Poahsoan en Kosonned wet me keieu ile nan Wein Sokehs oh manaman wet utung Poahsoan en Kosonned en Wein Pohnpei.

Met pahn wéhwehki me sohte songen kemwekid ehu sang rahn government siluh me mie nan Government en Wein Sokehs, aramas men, aramas kei de pwihn seulipilipil ieu nan Wein Sokehs kak en uhong ire seulipilipil ieu nan Poahsoan en Kosonned wet.

IRE LAUD ME PID "WASA ME WEIN SOKEHS KIPE" (2)

Nan mwehi kei me samwalahro, Kolonia Town Government oh pali laud en wasa me wia Nett rahnwet wia kisehn Wein Pwahpwahlik de Sokehs. Ni ahnsou kis Sounkawad akan ahpw mahwinihier wasa pwukat oh kalewedier oh uhd soumesehla. Iei ihme rahnwet, Lepen Nett oh Wasahi de Nahnpwutak Pikeniap de Nanmwariki Riemen wet ohl Sounkawad riemen oh sohte ehu soangen Sou kin kak iang alehdi lengileng pwukat sangete ni lohdi en wasa pwukat leledo rahnwet.

Eri ele pwehki ara peiren, sohte nehsapw ehu de pwalasapw ehu ira wiahda me nehkpeseng iawasa me Sokehs oh-Nett. Eri ahpw, tohn kousoan de kousapw akan me emen emen ira kasapwilada kin uhpahiong de nohpwei iong ihs rehra me kasapwiladahu. Eir mwohn wet me doula oh wiahda mehnia kousapw me iang oh nohpwei iong Lepen Nett de Wasahi Sokehs.

Nan mwein Japan, Nanmwariki en Pohnpei ketpene oh song en koasoanehdi duwen pwallap en Pohnpei, ahpw doadoahk wet sohte imusekla. Pil nan 1970 samwa, (mwein Kepina Falcam) ehu tiepene en koasoane pwallap pil wiawi oh wasah kei me soandi ah ekei wasa soh. Nett oh Sokehs sohte iang soandi pwehki kahrepe.

KAMWOMWADAHN IREPEN SOKEHS/NETT

Nin duwen me sansalehr pewe, kousapw Nanpil rahnwet kin wia kousapw keieu en Wein Sokehs mahs. Eri ahpw, sang ni kalipilipdahn mehn

Sokehs kan nan pahr 1911 oh lel ni ahr kopwurupwurdo, sohla mehn Sokehs kousoan wasa pwukat. Ihme karehda kamwomwada wet pweisang pali laud en wasahn oh men wiaki mehn nanpwungpene mwahu (compromise) en alehdi wasa kan me mehn Sokehs kousoandier nan wasah kan me karanih Nanpohleng oh Deke Sokehs.

Ire me pid Dolakapw, nin duwen me sansalehr, sapwungala ieu mie me dene Etscheit iang lel, nin duwen ar kose, Dolakapw. Wein Sokehs kamehlele me Pohn Umpwompw te me peneinei en Etscheit pwainda ah kaidihn Dolakapw de uluhl kan oh wahu kan me kisehn Dolakapw me iangahki Likin Long de Nan Malaihse. Ihme karehda Wein Sokehs kose wasa pwukat pwehn kolediong doadoahk en irail me kalewedier wasa pwukat nan mahwin me sansalehr pewe. Oh pwehn pil kolokol nanpwung mwahu me mieier sang mahs kohdo, Kahlap Riau me pahn ketin katengehdi oh kamangaila wasa me pahn wia pwallap en nin limahr Nett oh Sokehs.

KAMWOMWADAHN IREPEN SOKEHS OH KITTI.

Nan tiepenehn koasoane pwallap me wiawi nan mwein Kepina Falcam, mie nanpwungpene ehu mie ong pwallap en Sokehs oh Kittii nanpwungen Kahlap Riau oh mie wasa me pehs siment poadada ie. Ihme karehda nan Wein Kittii eh sohte men wauneki nanpwung mwahu penehn Kahlap Riemen pwukat, ihme karehda kamwomwadahn pwallap me sansal pwuralahng wasa me kisehn Wein Palikir keilahn aio. Kapwungpwunglahn ire wet pein ira Kahlap Riau en ketpene oh koasoanehdi.

WASA KAN LIKIN PAINA.

Wasa kan likin paina en Sokehs me iangahki deke Pakin,, Oroluk, oh Minto Reef, Wein Sokehs kose wasa pwukat pwehki eh mihmi nan irair

en:mile 200 oh pwehki tepin doadoahk oh kousoan pen wasa pwukat
mehn .Sokehs me tapiada.

IRE LAUD ME PID "TOWE MEHLEL" (3)

Ire Laud me pid Towe Mehlel koasoanehdi aramas me wia towe mehlel en Wein Sokehs ni ahnsou me Poahsoan en Kosonned wet kamanamanla.

Aramas me wia towe mehlel en Wein Sokehs irair diongete songen aramas pwukat:

- A. Aramas men me ni ah ipwidi, sohte lipilipil wasa ma nan Wein Sokehs de likin Wein Sokehs, emen rehn ah pahpa de nohno wia towe mehlel de pwilidak en Weipokon en Pohnpei oh pil wia towe mehlel en Wein Sokehs ni ahnsou me Poahsoan en Kosonned wet kamanamanla, wia towe mehlel en Wein Sokehs.
- B. Aramas men me wia towe mehlel en Wein Sokehs de mware kilekilel nan pwuhk en peneinei en Wehi de mware kilekilel nan pwuhk en eden tohn usuhs en Wein Sokehs ong usuhs me pid Government en Wein Pohnpei, pil wia towe mehlel en Wein Sokehs.

Ire tikitik 2 koasoanehdi ong Pwihn en Kawada Kosonned manaman en koasoanehdi wiepen wiala de sohla wia towe mehlel en Wein Sokehs. Manaman wet sohte mweidong Pwihn en Kawada Kosonned en wiada koasoandi ehu me pahn uhong saledek en aramas emen me wia towe mehlel en Weipokon en Pohnpei en wiala de sohla wia towe mehlel en Wein Sokehs.

IRE ME PID "KALOHKPEN PWUHNG KAN" (4)

Ire laud me pid kalohkpen pwuhng kan koasoanehdi pwuhng kan me emen emen towe mehlel ahneki nan Government en Wein Sokehs. Pwuhng pwukat me sansal nan ire tikitik ehu lel duwau en ire laud wet.

Report en ire laud wet sohte nohn oritik pwehki pwuhng kan me sansal pahn ire laud wet peiaii ong pwungin aramas akan me sansalehr nan Poahsoan en Kosonned en Weipokon en Pohnpei oh Poahsoan en Kosonned en Wein Kahndeke Kapatapat kan en Micronesia (FSM). Mour oh ineng en Ire Tikitik 5 en Ire Laud wet dore pwungin aramas me ni mahsen en wai lei "due process!"

IRE LAUD ME PID "USUHS OH PWUNGIN USUHS." (5)

Ire laud me pid Pwungin Usuhs oh Usuhs koasoanehdi manaman en usuhs, wiepen usuhs, ahnsoun usuhs en Chief Magistrate oh tohn Pwihn en Kawada Kosonned, usuhs tohrohr kan oh usuhs en repen kupwur kan.

Ire tikitik 1 koasoanehdi sounpar oh kak en towe mehlel en Wein Sokehs men en kak doadoahngki ah pwuhng en usuhs ong usuhs en Government en Wein Sokehs, usuhs en repen kupwur kan oh soangen usuhs tohrohr ehu me kosonned pahn koasoanehdi. Sounapr me koasoandi nan ire tikitik wet mihmi ni sounpar eisek-waluh (18). Kahrepen sounpar eisek waluh eh doadoahk, pwehki sang ni madamadau me iei ahnsou me emen emen aramas, mehndate ma lih de ohi, kakehr kawekaweid pein ih oh pil iei ahnsou me emen emen tohn wehi konehng en tepida wia ah pwukoah ong wehi. Ire tikitik wet pil irehdi towe mehlel en Wein Sokehs me mahkier sounpar eisek-waluh en doadoahngki ah pwuhng ma e dipekihda dihp toutou ehu me kareiong ih ah mihla pahn kalokepen dihp ni selidi en liki (parole) de selidi en ahnsou (probation) de pahn kalokolok en dihp toutou (under sentencing). Pwehn ekis akwehweh dahkot parole, probation oh under sentencing, parole wehwehki selidi en liki. Met pahn wehwehki me ma Mwolen Kopwung pahn koasoanehdi kalokepen dihp ieu me mihmi ni sounpar limau (5) oh aramas meno mier nan imweteng ki sounpar riau (2) ih eri uhd peki rehn Kepina en mweidong ih en uhd kanekehla sounpar luwedi ko likin nan imweteng. Met iei parole de selidi en liki. Probation de selidi en ahnsou, wehwehki me Mwolen Kopwung koasoanehdi me aramas meno sohte pahn

selidi nan imweteng, ahpw epahn selidi liki. Under sentencing, met wehwehki kapatapene parole, probation oh selidi en nan imweteng. Ire tikitik wet mweidong Pwihn en Kawada Kosonned en koasoanehdi kak en iang usuhs. Manaman wet konehng pwehn kak apwalih aramas me sohte ahneki madamadau unsek, me rasong saliel, iahk de sohng teikan.

Ire tikitik 2 kiong Pwihn en Kawada Kosonned manaman en koasoanehdi wiepen usuhs likin dahme sansalehr nan Poahsoan. Manaman wet inenen konehng pwe epwelpen usuhs en kak sansal ni oritik oh en kak apwalih usuhs me sohte kak wiawi pwehki kahpwal me rasong melimel oh soangen kahpwal teikan.

Ire tikitik 3 koasoanehdi me usuhs en Chief Magistrate oh towe kan en Pwihn en Kawada Kosonned pahn wiawi rahn teieu nan pahr paieu (4) koaros. Koasoandi wet konehng pwe epahn pweitikitik ong wehi oh ni ahnsouote pil kiong tohn usuhs en Sokehs ahnsou mwahu en usada welieperail kan ahnsou teieu.

Ire tikitik 4 koasoanehdi me epahn mie usuhs tohrohr oh usuhs en repen kupwur. Usuhs tohrohr kan pahn sewese apwalih sehr tehnda kan nan Pwihn en Kawada Kosonned oh tehnda ni sehr en Chief Magistrate, likin dahme Poahsoan en Kosonned wet koasoanehdi. Usuhs en repen kupwur pahn apwalih repen kupwur me pid wekideklahn ire ieu de ire kei nan Poahsoan wet opil sohng teikan me kosonned pahn koasoanehdi. Wiepen koasoanehdi ineng en ire tikitik wet pahn koasoandi sang kosonned.

IRE LAUD ME PID "PALIEN KAUWADA KOSONNED" (6)

Palien Kauwada Kosonned wia ehu ire laud nan Poahsoan wet sang ni eh wia ehu rahn Government me poahsoanehda Government en Wein Sokehs. Rahn Government wet me ahneki manaman en kauwada kosonned, ni mahsen en wai "Legislative Power" nan Wein Sokehs.

Ire tikitik 1 koasoanehdi manaman en kauwada kosonned nan Wein Sokehs, ongete Pwihn en Kauwada Kosonned en Wein Sokehs. Kosonned akan me kokouda sohte kak uhong koasoandi ehu nan Poahsoan wet, koasoandi ehu nan Poahsoan en Kosonned en Weipokon en Pohnpei oh kosonned akan en Wein Kahndeke Kapatapat kan en Micronesia (FSM).

Ire tikitik 2 koasoanehdi tohtohn lopidi en usuhs nan Wein Sokehs oh tohtohn weliepe kan nan ehu ehu lopidi en usuhs. Duwen me kamwomwada, lopidi en usuhs paieu (4) pahn mie oh tohtohn weliepe ong nan ehu ehu lopidi en usuhs pahn idawehn tohtohn towe mehlel en ehu ehu lopidi en usuhs. E konehng en sansal me ahnsou wet, lopidi en usuhs siluh (3) me mie oh epahn paieu la pwehn kak apwalih duwen tohtohlahn aramas akan. Pwihn en Kauwada Kosonned me pahn koasoanehdi mehnia wadawad en aramas manaman (official census) me pahn doadoahk ong ni koasoan-sapahl (reapportionment) en tohtohn weliepe ong ehu ehu lopidi en usuhs.

Ire tikitik 3 koasoanehdi kak en aramas emen en wiala weliepe nan Pwihn en Kauwada Kosonned en Wein Sokehs. Pwehki pwukoahn Pwihn en Kauwada Kosonned eh nohn kesempwal, e inenen konehng aramas men me

men wia weliepe en lel de kapwaiada irair kei me sansal nan ire tikitik wet.

Ire tikitik 4 koasoanehdi wiepen apwalih sehr tehnda kan nan Palien Kawada Kosonned. Duwen me sansal nan ire tikitik wet, usuhs pahn wiawi ong sehr me tehndao ma rahn me luwehdiko lel rahn silipwiki-weneisek (360) de tohtohsang, ah ma rahn me lwuehdiko malaulau sang rahn silipwiki-weneisek (360) ah Chief Magistrate me ahneki manaman en idiada emen weliepe pwehn peusehla ahnsou me luwehdio. Manaman wet ongete lopidi me tehndao mih loale.

Ire tikitik 5 kiong Pwihn en Kawada Kosonned manaman en pein pilada ah opsihr kan oh wiahda koasoandi en doadoahk. Ire tikitik wet pil koasoanehdi me Pwihn en Kawada Kosonned me pahn pwukoahki kilekilele audepen ah mihting kan koaros.

Ire tikitik 6 (A) koasoanehdi tiepene kan en Pwihn Kawada Kosonned. Udahn e konehng en mie ahnsoun mihting pwe lei ahnsou me kokoudahn kamwomwadahn kosonned kan kin wiawi. Ire tikitik 6 (B) koasoanehdi wiepen eker tiepene tohrohr. Manaman wet mihmi rehn Chief Magistrate oh Pwihn en Kawada Kosonned. Manaman wet inenen konehng en mie pwehn kak apwalih ire karuaru kan me kesikpe sohte mie. Ire tikitik 6 (C) koasoanehdi me tiepene koasoandi oh tiepene tohrohr koaros pahn langada ong weipokon. Koasoandi wet sohte tiesemwehla wiepen mihting kan likin tiepene, met pahn rasong en Committee kan arail mihting.

Ire tikitik 7 koasoanehdi quorum de wen tohtohn weliepe me kak karehda Pwihn en Kawada Kosonned en tialahng nan ehu tiepene.

Koasoandi wet konehng en mie pwehn kak kolokol pwungin pali moron.

Ire tikitik 8 koasoanehdi silasil ong weliepe kan ong nan Pwihn en Kawada Kosonned. Silasil wet udahn konehng en mie pwe weliepe men en kak kapwaiada ni mwuledek, ah pwukoah ong aramas me e weliwelian. Silasil wet manaman ongete ni ahnsou me Pwihn en Kawada Kosonned mih nan tiepene oh Committee mihting kan.

Ire tikitik 9 kiong manaman en kedimpak ong Pwihn en Kawada Kosonned oh Committee kan. Manaman wet udahn konehng en mie pwe Pwihn en Kawada Kosonned oh ah Committee kan en kak ropada sawas akan ong ni koasoanepen ireh kan me mih mwohrail.

Ire tikitik 10 (A) irehdi tohn Pwihn en Kawada Kosonned en ale ehu soangen pweipwei sang Government en Wein Sokehs, likin pweinerail. Irairdi wet sohte pid pweipwei me kohda sang Pwihn en Kou Pahsoan. Ire tikitik 10 (B) irehdi tohn Pwihn en Kawada Kosonned en ale ehu pwukoah nan Government en Wein Sokehs, likin pwukoahn Pwihn en Kawada Kosonned. Irairdi wet sohte pid tohn Pwihn en Kawada Kosonned en kak iang towehda pwukoah ong lepin ahnsou oh pwukoah me pid kapweipweidahn pwukoah (legislative responsibility). Re pil kak iang towehda en pwihn en kou poahsoan de soangen pwihn teikan.

Ire tikitik 11 kiong manaman Pwihn en Kawada Kosonned en kawada pwihn kan me rasong Board, Commission, Authority oh soangen pwihn teikan me anahnepe mie pwehn kapwaiada pwukoah oh doadoahk en wehi.

Ire tikitik 12 koasoanehdi wiepen kokoudahn kamwomwadahn kosonned oh wiepen kapedelong kamwomwadahn pekipek ong nan Pwihn en Kawada Kosonned. Sohte ehu soangen koasoandi me pahn kak manaman likin

koasoandi en ire tikitik wet.

Ire tikitik 13 koasoanehdi manaman me Pwihn en Kawada Kosonned ahneki ong kamwomwadahn kosonned akan me Chief Magistrate sohte kin kamana (veto). Manaman wet ni mahsen en wai iei "override". Ire tikitik wet kasalehda me Pwihn en Kawada Kosonned kak en doula pohn sou-kamanaman (veto) en Chief Magistrate. Ahpw doula pohn sou-kamanaman en Chief Magistrate pahn anahne usuhs en "Ei" en pahkis-siluh (3/4) en tohn Pwihn en Kawada Kosonned, ni soh pohnese sehr tehnda kan.

IRE LAUD ME PID "PALIEN KAKEHLAKA KOSONNED" (7)

Ire tikitik 1 kasalehda me Ohpis en Chief Magistrate me kolokol manaman en kakehlaka kosonned akan koaros en Government en Wein Sokehs opil kosonned teikan me sohte irairdi sang kosonned en State en Pohnpei.

Ire tikitik 2 kasalehda me Chief Magistrate men udahn anahne en lelehr sohte tikitik sang sounpar silihsek (30) nin lukopen-pwong mwohnte rahn me ah dien doadoahk pahn tepida. Epahn kapwaiada ineng en towe mehlel nin duwen ah kawehwehdahr nan Ire Laud 8 en Poahsoan wet, oh pwe en pil kak wia soun papah men me pahn wehwehki ah wehi, e udahn pahn wia towe mehlel en Pohnpei sounpar rieisek (20), oh sounpar eisek-limau (15) wia towe mehlel en Wein Sokehs. Aramas men me sohte wia towe mehlel en Pohnpei me keseudahr mware ong Wein Sokehs oh koukousoan ki erein sounpar silihsek-limau (35) nan Wein Sokehs, kak iang usuhs ong sehr en Chief Magistrate. Pwukoah en Chief Magistrate wia pwukoah kesempwal, karehda en irairdi ong soun doadoahk me likilik oh kopworopwor oh sohte ad suwed kihla mwekid suwed ehu me kauwehla soare oh likilik rehn aramas. Aramas emen me dipekidahr dihp toutou ehu sohte kak wia Chief Magistrate, mehndate ma epil aleier kisin likou en mahk me kapwurelong ih ah pwuhng kan.

Iretikitik 3 koasoanehdi me aramas emen me usuhsdahng sehr en Chief Magistrate pwehn peusehla dien ahnsoun doadoahk ieu me tehndahr, pahn doadoahk sohte daulih dien ahnsou en doadoahko me e peusehlao.

Ire tikitik wet apwalih wiepen audehda sehr en Chief Magistrate ni epahn tehnda sang seilok, kommel, soumwahu de mehla. Ma tehnda wet pahn pid soangen kemwekid me duwehte pwilikhdi ah doadoahk de resign, sohla kak doadoahk ni ah mwatorala, saliel la, de soukautih ape oh mehla, sehro udahn pahn audaudda nin duwen wiepen kosonned apahn koasoanehdi. Ama rahn me luwedi kan ong ah dien ahnsou en doadoahk mihmi ni rahn silipwiki-weneisek (360) de tohtosang, ah usuhs tohrohr pahn wiawi.

Ire tikitik 4 oh 5 koaros kasalehda me moange-moangen doadoahk kan nan ohpis en Palien Kakehlaka Kosonned pahn kin idihdda sang Chief Magistrate oh alehdi kaweid oh kamanaman en Pwihn en Kawwada Kosonned. Chief Magistrate pahn kaunopada kamwomwada en organization en Palien Kakehlaka Kosonned me pahn kawehwehda palien doadoahk kan nan ah ohpis oh kadalalahng Pwihn en Kawwada Kosonned pwehn kamana. Ma Pwihn en Kawwada Kosonned sohte wialong wiepe nan irair en rahn weneisek (60), ah kamwomwadao manamanlahr. Chief Magistrate pahn pwukoahki oh tetehk mwekid mwahu en ah ohpis, kak en alehda soun doadoahk en lepin ahnsou oh permanent, opil kak en kakommoalehdi soun doadoahk men me solahr anahnepe. Doadoahk koaros me mie anahnepe nan ohpis en Chief Magistrate likin me idihdda kan udahn pahn pakair nan wehwe de nan kisin likou pwehn kiong ahnsou mwahu ong tohn wehi en iang kapedelong ah pekipek (apply).

Ire tikitik 6 kasalehda me Chief Magistrate kak en kamana ire ieu de ire kei nan kamwomwada en Ordinance kan me pahn koasoanehdi duwen doadoahkla en mwohni kan en ehu ehu pahr. Ire wet songosong en sewese soangen koasoandi kan me Chief Magistrate medemedewe konehng

en kapwandala, sohte alahlda de kapweipweida sang ni seu itar en
mwohni de ire karuaru teikan.

IRE LAUD ME PID "MWOALEN KOPWUNG EN WEIN SOKEHS (8)

Omwi Committee tehkehr ni keneinei kamwomwada ehu me kaunopahr sang Soun Sawas Torohr en Kou-Poahsoan en Wein Sokehs oh pwungkilahr ah tungoal koasoandi kan me pid Palien Mwoalen Kopwung en Wein Sokehs. Me pahn sansalda pah kan iei duwen report sang ni petehk keneinei me pid palien kopwung, ni report wet ah songosong en kawehweh ehu ehu ire tikitik kan:

Ire tikitik 1 koasoanehdi me epahn mie Rahn Tenèki Kosonned nan Government en Wein Sokehs. Mwoahl ehu me mene kipe wehi, pahn adaneki Mwoalen Kopwung en Wein Sokehs. Ire tikitik wet kis-peseng wiada ire paiu, pwehn koasoanehdi oh katohre soangen manaman akan me tehlap, oh me pisetik me mie nan rahn government wet. Iei manaman pwukat me mauri-rail kawehweh pah.

A. Manaman-lap en palien kopwung. Manaman lap wet iei me nan kawehwehn pato en English patowan, "judicial power". Ire tikitik wet koasoanehdi me Mwoalen Kopwung en Wein Sokehs me kolokol manaman lap en karonge, tenèki, oh koasoanehdi kopwung kan nan Wein Sokehs, me pid kosonned (in laws) oh me sohte pid kosonned (in equity). Ire tikitik wet auraman me nin duwen wekiwekideklahn mwehi oh anahn ong mour en aramas akan, ele e kak pwarada me mie anahnepen "mwoalen kopwung tikitik" en kokouda nan kousoan akan en wehi wet.

Ire tikitik wet kehkehlik me soangen "mwoalen kopwung" wet kelehpu me pahn kak iang ahneki oh doadoahngki manaman lap wet, ni duwen eh pahn koasoandi sang kosonned. E konehng en dehdeh me ineng en kodahn manaman wet kalikedi kosonned en song sapwadada manaman lap wet ong "pwihn en tenek" teikan me pahn rasohng pwihn en wia usuhs, pwihn en isimen, personnel board, de songen board oh commission kan me pahn kin kokouda nin duwen ahahn. Soangen pwihn pwukat sohte kak iang ahnekihla unsek manaman lap en mwoalen kopwung ma Poahsoan wet katengedier ongete nan "mwoalen kopwung". Mwoalen Kopwung, me iei towe "soun kopwung" te me ahneki manaman wet. "Pwihn en tenek" kan pahn ahneki manaman en tenek oh koasoanehdi ire kan me irail kokou-kihda, eri ah manaman wo kolokolete ekis en menen kopwung (quasi-judicial power). Manaman en Kopwung. Manaman wet iei me nan kawehweh ni pato en English patowan, "jurisdiction". Ire tikitik wet pohnese me Government en Wein Sokehs momour pahn mwetehn Government laud riau, Government en Weipokon en Pohnpei, oh Government en Kahndeke Kapatapat kan en Micronesia. Pwehki ire mehleh wet, ire tikitik wet pahn koasoanehdi nan Poahsoan mwomwen palien kopwung en Government en Wein Sokehs eh pahn kadoke sapwelime pwukoah oh manaman akan ong government riau-o. E dehde me Poahsoan wet sohte pahn kak kadoke government wet loale ong Government en Kahndeke Kapatapat kan en Micronesia, pwehki e mie ehu dake-en government nan pwungara, oh pwehki e deh-pahn poaloangoalong ong de uhongada dake en Government en Weipokon en Pohnpei. Kahrehda iei wiepe me ele pahn konehng, ma Poahsoan wet pahn kadoke Government wet ong Government en Weipokon en Pohnpei. Nin duwen ineng wet, ire tikitik wet songosong en koasoanehdi me manaman (jurisdiction) en Mwoalen Kopwung en Wein Sokehs pahn

kopwung en pwuhng oh kopwung en dihp kan, pahn peiai iong (congruent) oh idawehn de sek pahn menen Mwoalen Kopwung en Weipókon en Pohnpei, nin duwen me koasoandier nan Poahsoan en Kosonned en Weipokon en Pohnpei, de me pahn koasoandi ni kosonned. Irepen manaman en mwoalen kopwung tikitik kan nan Wein Sokehs pahn pil peiai ong oh sek pahn menen Mwoalen Kopwung en Wein Sokehs, nin duwen me pahn koasoandi ni kosonned en wehi wet.

B. Manaman ne tenek-sapahl oh tehk-sapahl; Mwoalen Kopwung en Wein Sokehs.

Iei manaman wet me ni patoh en English patowan "power on appeal and review". Ire tikitik wet kiong Mwoalen Kopwung en Wein Sokehs manaman en tenek-sapahl kopwung-sapahl kan me kohsang nan mwoalen kopwung tikitik kan en wehi wet. Epil kiong manaman wet nan Mwoalen Kopwung en Wein Sokehs en kak tehk-sapahl pwungilahn kopwung kan nan mwoalen kopwung tikitik kan me sohte pidada kopwung-sapahl, oh en pil kak tehk koasoandi kan me wiawi sang officer de pwihn kan nan Government en Wein Sokehs. Ire tikitik wet sohte songosong en wiada pali riau nan Mwoalen Kopwung en Wein Sokehs- palien tepin kopwung oh palien kopwung sapahl. Palien tepin kopwung te me pahn mie nan Mwoalen Kópwung en Wein Sokehs, eri ah pali wet ahpw pahn ahneki manaman en tehk kopwung sapahl akan sangete nan mwoalen kopwung tikitik kan. Kopwung sapahl me pahn wiawi sang nan Mwoalen Kopwung en Wein Sokehs pahn ale petehk sapahl pe nin duwen ire tikitik pah.

C. Manaman en tenek-sapahl; Mwoalèn Kopwung en Weipokon en Pohnpei.

Ire tikitik wet utung Ire Laud 10, ire tikitik 9 en Poahsoan en Kosonned en Weipokon en Pohnpei, me men kapatapehe palien kopwung kan nan Pohnpei. Nin duwen met, ire tikitik wet koasoanehdi me manaman en tenek-sapahl kopwung-sapahl kan sang nan Mwoalen Kopwung en Wein Sokehs mihmi rehn Mwoalen Kopwung en Weipokon en Pohnpei. Mwoalen Kopwung en Weipokon en Pohnpei pil ahneki manaman en tehk-sapahl pwungilahn kopwung kan nan Mwoalen Kopwung en Wein Sokehs me sohte pidada kopwung sapahl.

Ire tikitik 2 koasoanehdi wiepen idihd dahn soun kopwung kan nan Wein Sokehs. Ire tikitik wet irehdi tohto en iengen soun kopwung kan en dehr tohto sang meh riemen. Ineng en ire tikitik wet sohte pahn idihd dahn iengen soun kopwung kan en udahn^{lel} meh riemen. Tohtohn soun kopwung pahn udahn idawehn mehlel en anahn, oh kak en pai en wehi. Ire tikitik wet pil sohte kasik me soun kopwung koaros pahn wia tohn doadoahk poatoapat (full time). Kosonned pahn koasoanehdi, nin duwen anahn mehlel, oh pai en wehi (financial capacity) ma soun kopwung emen de tohto sang konehng en mie, oh ma me idihd dahr akan konehng de sohte konehng en wia pwukoah poatoapat.

Idihd dahn soun kopwung kan pahn kin wiawi sang Chief Magistrate, oh pahn udahn kin ale kaweid oh kamanaman en usuhs "Ei" sohte tikitik sang silikis-riau (2/3) en tohn Pwihn en Kawada Kosonned (Council) ni sohte pohnese sehr tehnda kan.

Dih en ahnsou me soun kopwung men pahn doadoahk nan Mwoalen Kopwung en Wein Sokehs pahn mihmi ni erein sounpar waluh (8).

Ire tikitik 3 intingda pwehn irehdi ihs me sohte kak wia soun kópwung en Mwoalen Kopwung en Wein Sokehs. Met wehwehki me aramas me sohte ahneki karopw me dehde nan ire tikitik wet kak wia soun kopwung.

Irairdi wet kipe mwoalen kopwung tikitik kan. Ire tikitik wet irehdi aramas emen me saikinte mahki sounpar silisek-limau (35) en wia soun kopwung. Pilipil en pahr wet wiawi pwehki e mihmi nan mademedewe en pali ngeder en aramas me aramas emen me lelehr sounpar silisek-limau miher nan iráir en lamalam me son, kanengamah oh ahneki wehweh laud, oh kolokol kopworopwor. Ire tikitik wet pil irehdi aramas emen me dipeki-dahr dihp toutou en wia soun kopwung. Kahrepen irairdi wet me sansal, pwehki aramas emen me dipekidahr dihp toutou kiong ih nan mour kasohlikilik nan kousoan oh uhongadahr wehi ni eh kauwelahr kosonned ehu en weipokón me toutou.

Ineng en ire tikitik 4. pohnese me pil miete soangen aramas me sohte konehng en wia soun kopwung, me rasohng aramas me sahliel de iahk.

Epil dehde me ni pilipil pen soun kopwung eh pahn wiawi, candidate kan udahn pahn kin ale petehk mwahu ohng ihs me inenen konehng en idihd da, sang ni koiek, likilik, oh kopworopwor en me epahn kak wia pwukoahn soun kopwung, oh kak kolokol adamwahu oh wahu en mwoalen kopwung.

Ire tikitik wet pil kesempwaliki poahsoan en mour, anahn, medemedewe oh tiahk en songosongen aramas akan me sansal wiewia tewe mehlel en Wein Sokehs. Pwehki met, Poahsoan wet likih me aramas emen anahne en wiahier tewe mehlel en Wein Sokehs oh nan erein ahnsou wet pahn patehngehr oh

wehwehkilahr mwomwen mour, anahn, medemedewe, tiahk oh kosonned akan en wehi wet pwe en kak wiala soun kopwung men.

Ire tikitik 5 kiong manaman oh pwukoah en kawekaweid oh kakaun doadoahk oh tohn doadoahk kan nan mwoalen kopwung kan en Wein Sokehs. Soun kopwung Keieu pil ahneki pwukoah en apwalih dipwisou oh ihmw de sahpw akan en mwoalen kopwung, iangahki pilahn en mwohni oh kemwekid pen mwohni en pelien kopwung. Ire tikitik wet kapatahla pwukoah wet pahn manaman oh pwukoah en Soun Kopwung Keieu en Mwoalen Kopwung en Weipokon en Pohnpei, nin duwen me koasoandier nan ire laud 10, ire tikitik 9 en Poahsoan en Kosonned en Weipokon en Pohnpei. Ire tikitik wet sohte kolokol inengin kanaitikada liakotrohr nan pwungen rah en government kan ong nin duwen plan oh wiepen pekipen mwohni. Palih kan pahn saleded iong wiada songen koasoandi me pahn kamangaila doadoahk en pekimwohni, nin duwen me pahn soandi pahrek nan pwungen palih kan me pahn pidada.

Ire tikitik 6 kawehwehda me pwungilahn kopwung kan nan Mwoalen Kopwung en Wein Sokehs oh Mwoalen Kopwung Tikitik kan pahn idawehn ineng en Poahsoan en Kosonned wet, opil ni ahnsouote, idawehn wiepen tiahk me kin kak wia mehn tenek ong koasoanehdi pwungilahn kopwung, ahpw mehlel me pidada dihp. Madamadau wet pid pekimahk kan me kin wiawi ong dihp laud me rasong kam-aramas ape, oh songen dihp toutou teikan me peneinei kin wia pekimahk pe nin duwen tiahk. Pekimahk de mahkpene nan pwungen pali riau me pidada dipen kam-aramas sohte wehwehki me epahn kasohrela koasoandi en Mwoalen Kopwung ong ni tenek pen dihp wet, ahpw e wia ehu elen madamadau ong Sounkopwung kan me pahn teneki dihp, ong ni toutou de marahra en kalo-kepe kan. Wiepen tiahk ong ni pekimahk pil kak doadoahk ong ni kopwung en

Pwuhng, me rasong kasapwasapw nan pwungen pali riau me peneinei ahpw
ahneki soansued pohn nehneh sapwera me koasoandi sang irail kan me
tepin nehkedi sahpw wet.

IRE LAUD ME PID "TAXES OH MWOHNI EN WEIPOKON" (9)

Ire laud wet pid Taxes oh Mwohni en Weipokon wia ehu ire laud nan Poahsoan wet sang ni eh wia ehu ire kesempwal nan mour en ahnsouwet oh ahnsou me pahn kohdo muhr kan. Me dehde ahnsou pwukat, mwohni me wia kemour pen Government en rahm pwukat. Ni karasaras, mwohni iei intahn Government.

Ire tikitik 1 koasoanehdi manaman en kauwada taxes oh soangen isais teikan nan Wein Sokehs ong Government en wehi. Manaman wet sohte tiesemwe manaman en kauwada taxes oh soangen isais kan me Kahndeke Kapatapat kan en Micronesia (FSM) oh Pohnpei State Government ahneki. Manaman en kauwada taxes oh soangen isais teikan konehng Government en Wein Sokehs en sapwelimaniki sang ni kahrepe de kawehwe me sansalehr pewe.

Ire tikitik 2 koasoanehdi ohpis ieu me pahn pwukoahki wasahn nekinek en mwohni (Treasury) en Government en Wein Sokehs. Sohte mwohni ehu kak en kapedohi sang nan wasahn nekinek likin dahme kosonned koasoanehdi oh mwohni pahn doadoahk ongete kamwahu pen weipokon (public purpose).

Ire tikitik 3 koasoanehdi inoun doadoahngki mwohni (obligation of fund) oh kapedohi en mwohni (withdrawal of fund) sang nan wasahn kanekid pahn koasoandi sang kosonned. Koasoandi wet konehng pwe wiepe kan en kak sansal ni oritik. Kosonned me pahn koasoanehdi mour oh ineng en ire tikitik wet pahn kokouda ni soangen mwohmw ehu me pahn dore

doadoahklahn mwohni en dehr daulihla wen mwohni me mie.

Ire tikitik 4 koasoanehdi me Chief Magistrate me pwukoahki kaunopdahn oh kapedelong en budget ong Pwihn en Kawada Kosonned, budget en wasahn doadoahk kan koaros me wia kisehn Government en Wein Sokehs ong ehu ehu pahr en doadoahngki mwohni en weipokon. Koasoandi wet sohte pid kaunopdahn budget en Palien Kawada Kosonned (Council) oh Palien Mwolen Kopwung (Judiciary). Ni ahnsou me Chief Magistrate pahn alehdi budget en Palen Kawada Kosonned oh Palien Mwolen Kopwung, epil kak kasalehda ah kaweid ong ni budget pwukat oh ni ahnsou karuaru, kadarohng Pwihn en Kawada Kosonned. Budget kan pahn koasoandi ni mwohmw ehu oh kasalehda soangen ireh kan me pahn anahn nin duwen koasoandi en kosonned. Chief Magistrate pahn kadarohng Pwihn en Kawada Kosonned budget wet nan irair en ahnsou me kosonned pahn koasoanehdi.

Ire tikitik 5 koasoanehdi epwelpen doaropwe kan me wia mehn kadehde ong ni mwohni kan me kapedelong oh mwohni kan me kapedohi sang nan wasahn nekinek. Doaropwe pwukat pahn wie nekinek ni keneinei erein sounpar siluh (3) mwurin petehk pen mwohni kan eh wiawihier.

Ire tikitik 6 koasoanehdi ahnsou me petehkpen mwohni kan (audit) en Government en Wein Sokehs kin wie doadoahngki. Petehk pen mwohni kan pid kapedelong oh kapedohi en mwohni. Petehk pen mwohni kan pahn kin wiawi sohte malaulau sang pak ehu nan irair en pahr riau (2) koaros ma anahnepe pahn mie. Pwihn en Kawada Kosonned kak en pekihda audit en wiawi. Pekipek wet pahn alahlda ni mwomwen pekipek (resolution). Sawas en audit kak en kohsang Pohnpei Government oh FSM Government. Ma sawas en audit sohte kak wiawi sang Pohnpei

Government oh FSM, ah contract en audit kak wiawi sang aramas emen de pwihn ehu me ahneki kolek en audit (CPA). Report en audit kan pahn kin pekederlahng Chief Magistrate oh Pwihn en Kawada Kosonned oh kaweid koaros me sansal nan report en audito pahn kepweipweida nin duwen me kak.

Ire tikitik 7 koasoanehdi me Chief Magistrate pahn pwukoahki kaunopda oh kapedelong ong Pwihn en Kawada Kosonned report en mwohni kan me doadoahkla nan ehu ehu pahr en mwohni (fiscal year).

Ire tikitik 8 kiong Government en Wein Sokehs manaman en pekihda mwohni (public credit) pwehn sewesehki program de project kan ongete keirdahn pai en wehi. Manaman wet konehng en mie nan Government en Wein Sokehs pwehn kak apwalih ki anahn me pahn utungada pai en wehi oh kokoudahn oh kamwahulahn doadoahk lap`akan oh dipwisou lap akan en weipokon. Mwohni me wehi pahn pekihda ni (loan) sohte pahn daulihla elep en mwohni kan me wehi kak pein rikada (local raised revenues), mwohni kan me kin kohda sang Weipokon en Pohnpei nin duwen koasoandi en kosonned oh nin duwen koasoandi en Poahsoan, en Wein Pohnpei (Constitution), me pidada pwais en Wein Sokehs, oh mwohni kan me Kahndeke Kapatapat (FSM) kin kihda ong project de program akan nan Wein Sokehs.

IRE LAUD ME PID "SAHPW" (10)

Sahpw wia ehu ire laud nan Poahsoan en Kosonned wet sang ni sahpw eh nohn kesempwal oh madamadau me ehu rahn, pwehki eh sohte koasoandi tengeteng ieu mie nan Poahsoan en Kosonned en Weipokon en Pohnpei me pid sahpw, manaman unsek en apwapwalih sahpw, ahpw mehlel sahpw akan me saikinte kasapwasapwala (public lands), kakete kolahng wehi kan. Kou Poahsoan en Wein Sokehs, ni eh sapwelimanikihla madamadau wet, pil sapwelimaniki pepèhm me e tetehn Pohnpei Government, nin duwen koasoandi en ahsouwet, me pwukoahki epwelpen sahpw, kemwekid koaros me pid sapwen Wein Sokehs pahn alehdi kamanaman sang government en Wein Sokehs. Met sansal nan ire tikitik 1 oh 2.

Ire tikitik 3 (A) kiong government en Wein Sokehs manaman en alehda, pwainda oh kolokol sahpw ni eden wehi. Sahpw akan me alahlda pahn doadoahk ongete kamwahu pen Wein Sokehs. Sahpw akan me pahn pweipweida pahn mehen ire tikitik wet pid sahpw me aramas emen inengiong netikihla. Wiepe kan me pidada alahldahn oh epwelipen sahpw pahn koasoandi wet pahn koasoandi sang kosonned.

Ire tikitik 3 (B) kiong government en Wein Sokehs manaman en doadoahngki sahpw akan me mihmi nan irepen Wein Sokehs, ongete kamwahu pen wehi. Manaman wet, ni mahsen en wai, iei "Eminent Domain". Ni ahsou me manaman wet pah doadoahk, Government en Wein Sokehs pahn kihda isais me pwung oh koñehng.

Ire tikitik wet kiong Fwihn en Kawada Kosonned en Wein Sokehs en koasoanehdi sang kosonned wiepen doadoahngki manaman wet.

Ire tikitik 4 koasoanehdi me PAHM koaros nan Wein Sokehs pahn mih pahn epwelpen Nanmwarki, Chief Magistrate oh Kaun en Kousapw en wasa me PAHM mih loale. Koasoandi koaros me pid FAHM udahn pahn mie karongorong pe wiawiong towe mehlel en Wein Sokehs me pid wasa me PAHMO mih loale. Pwehki Pahn ah wia ehu wasahn kousoan ong irail kan me sohte arail wasahn kousoan nan Pohnpei, ahpw mehlel irail me kohsang wein liki kan, pelien sapw wet kohda ongete kousoan ahpw kaiden wasahn kousoan tengeteng. Epwelpen Pahn udahn konehng en mie pwehn kak dore duwen tohto-lahn aramas me kak kousoan nan ehu Pahn, oh en pil doare duwen par-peseng en soumwahu ni apahn pwarada, iangahki kahpwal me pahn pwarada sang ni son-sued en pehsepene en aramas akan me koukousoan nan ehu Pahn akan. Nin duwen kaweid me alahldi sang ohpis en Land Commission en Wein Pohnpei, Pahn kohda pwehn wia wasahn kousoan ong aramas akan me saikinte diar arail wasahn kousoan de sapwerail, ahpw kaiden wasahn kousoan teng.

Ire tikitik 5 koasoanehdi me epahn mie isepen doadoahngki sapwen weipokon (Wein Sokehs) oh wiepen isais kan pahn koasoandi snag kosonned. Madamadau wet kohsang ni ouraman me ehu rahn aramas pahn tohtohla ah sahpw akan pahn duweduwete oh pwehn kolokol sahpw ong dien mwuhr kan, epahn konehng sahpw en dehr kasapwasapwala ah aramas en ise ni ahnsou me re wie doadoahngki.

IRE LAUD ME PID "TIAHK" (11)

Report wet pid te kamwomwada me pid ire tikitik 3 en ire laud pahn TIAHK, pwehki iei me omwi Committee diarada sang nan kasikuhl en Poahsoan wet ah wiawi ong tohn Wein Sokehs, oh pil langahki madamadau'kei me sansal sang tohn Kou-Poahsoan wet.

Ire tikitik wet songosong en dèhr sair koasoandi kan nan Mwoalen Wahu en Wein Sokehs pwe iei eh wia koasoandi ieu me poadada sang keilahn aio oh pahn pein koasoakoasoane pein ih ^{peipekan} pelipelian wekideklahn mwehi. Ire wet songosong en pohnese tiahk kan en mour me mie, nan Wein Sokehs me pid mehleh wahupenehn nanpwungen aramas, keinek oh peneinei kan. Met pil dōke mehleh tiahk en mour teikan me pid wiepen apwalih wahn sehd oh wahn sahpw akan pwehn kak wia kapai ong mehn Sokehs koaros. Ire wet sohte men pohnese tiahk teikan me sohte sewesehda mour mwahu en peneinei oh kekeirdahn pai en wehi. Mwekid kan me sohte pahn kairāda mour en aramas, Poahsoan wet sohte pohnese.

Ni oralap, ire tikitik wet pil idawehn inengin Poahsoan en Kosonned en Wēin Pohnpei me pid tiahk.

IRE LAUD ME PID "MANAMANLAHN POAHSOAN EN KOSONNED WET" (15)

Ire tikitik wet kasalehda me Poahsoan en Kosonned wet pahn manamanla rahn me Chief Magistrate pahn kalohk-kidahr ong tohn Wein Sokehs unsek me usuhs en repen kupwur pweidahr oh aledier kamanaman en pali moron en irail kan me usuhs rahno. Chief Magistrate ahneki sohte pwandasang rahn eisek (10) mwurin usuhs eh wiawier oh soandier, pwehn kamelehleda de kalohki usuhs wet.

IRE LAUD ME PID "IRE ORALAP TEIKAN" (12)

Committee tehkehr report kan me idanlong kamwomwada kan me sansal pahn ire laud wet oh diarada me e konehng en sansal inengin ehu ehu ire tikitik kan pwehn kak kawehweh ia kupwuren Pwihn en Kou Poahsoan. Sang ni kahrepe wet, Committee pil men report ki ong Mwolen Kou Poahsoan en ketin kupwure oh sapwelimanikihda iren kaweid me pahn sansal pah kan.

Ire tikitik 1 pil kasalehda me Mwolen Kou Poahsoan kuwpuriki lepin mahsen "Pesen" en doadoahk pwe iei ih lepin mahsen wet me pahn kawehweh mwahu mour oh inengin koasoandi kan me pahn wiawi pahn ire tikitik wet. Committee kawehweh me iei kupwuren Mwolen Kou Poahsoan me lepin mahsen "pesen," ni mahsen en wai, wehwehki (Seat of the Government), me pil pahn wehwehki wasa me sohng kesempwal akan en ohpis kin tepida de wesada sang ie.

Ire tikitik 2 wet kawehweh, ni oralap, iei me koasoanehdi pweinen me usuhsda, idihdda oh tohn doadoahk teikan koaros en Government en Wein Sokehs. Koasoandi oritik me pid ire tikitik wet pahn ahpw koasoandi sang kosonned.

Ire tikitik 3 kasalehda me omwi Committee kamehlele me inengin ire tikitik wet me sansal mwahu. Ire tikitik 3 wet kasalehda me lapalap men en Government en Wein Sokehs, me iangahki Chief Magistrate, Pwihn en Kawada Kosonned, oh Soun Kopwung, kak lekidek sang nan arail

pwukoah kan, ongete ni kahrepe me pid sohte kapwaiada ah pwukoah, wiada wiewia ehu me sohte konehng nden ohpis, sohla kak wia ah pwukoah sang ni luwet en paliwar de seu-kautihla, de dipekihda dihp ehu me pahn kandand-suwediala ohpis. Ire tikitik 15a, 15b, 15c, 15d oh 15e koasoanehdi wiepen kesehsang lapalap men.

Ire tikitik 4 (A) kasalehda wiepen kapedohi sang Chief Magistrate, ni wiepen usuhs, mehndate ma e saikinte lel ehu ahnsoun usuhs. E koasoanehdi me sain en mwaren aramas me adarail kilekilel nan pwuken usuhs en Wein Sokehs pahn anahne en lel uwen percent paisek (40%) pwehn kak karehda usuhs tohrohr ehu en mie, opil anahne uwen percent limeisek-ehu (51%) en tohn usuhs me pil kilekilel nan pwuken usuhs en mie pwe Chief Magistrate men en kak kapedohi sang nan ohpis pahn menen ire tikitik wet. Ire tikitik 4 (B) songosong en pil koasoanehdi soangen mwohmw me sansal pahn ire tikitik wet ahpw met ongete Pwihn en Kawada Kosonned.

Ire tikitik 5 koasoanehdi me Pwihn en Kawada Kosonned pahn koasoanehdi ehu pwuhk en wiewia mwahu en tohn doadoahk en ohpis en Wein Sokehs (Code of Ethics) oh audepen pwuhk wet pahn manaman duwehte kosonned.

Ire tikitik 6 kiong manaman en Pwihn en Kawada Kosonned en kak kawada kosonned en rahn kesempwal de rahn lapalap akan (Holiday) ongete Wein Sokehs.

IRE LAUD ME PID "WEKIDEKLA KAN ONG POAHSOAN WET" (13)

Ong ni ire me pid ehu ehu ire tikitik kan me audehda ire laud wet, iet duwen Omwi Committee ah diarada.

Ire tikitik 1 (A) kawehwehda me Pwihn en Kawada Kosonned kak kamwomwehda wekidekla ieu ong Poahsoan en Kosonned wet ma silikis-riau (2/3) en tohn Pwihn en Kou-Kosonned pahn pwungkipene wekidekla wet en wiawi. Ma kamwomwadahn wekidekla wet passer, ah epahn pekederla ong Chief Magistrate pwehn kadokelahng aramas pwe usuhspe en wiawi ma wekidekla wet konehng en wiawi de soh. Chief Magistrate sohte kak doadoahngki ah manaman en sou-kamana de (veto) kamwomwadahn kosonned me pass sang Pwihn en Kawada Kosonned me pid wekidekla wet. Chief Magistrate pahn koasoanehdi rahn ehu me usuhs pen kamwomwadahn wekidekla wet pahn wiawi sang aramas, nan erein rahn eisek (10), mwurin kamanamanlahn kosonned me kawada kamwomwadahn wekidekla wet. Ire tikitik 1 (B) kawehwehda mwahu me aramas pil kak kamwomwehda wekidekla ieu ong Poahsoan wet ni arail pahn wiada pekipek (petition) ehu me pahn pekeder iong Chief Magistrate oh pekipeko pahn kolokol sain en silikis-ehu (1/3) en mwaren aramas me wia towe mehlel me kin iang usuhs. Ni alahldi en pekipeko, Chief Magistrate pahn kamehleleda sang nan puuken wehi, ma sain en aramas pwukat mehlel. Ni petehk ah kasaledahr me pekipek en wekideklao mehlel, Chief Magistrate pahn koasoanehdi rahn ehu me aramas pahn usuhski kamwomwada wet, oh wiepen usuhs pil pahn daur nin duwen koasoandi en usuhs pahn ire

tikitik 1 en ire laud wet. Ire tikitik 1 (C) kasalehda me pekipek en wekidekla kan koaros me kapedelong sang Pwihn en Kawada Kosonned de sang Aramas pahn ire tikitik 1 oh 2 pahn pid ire teieu nan Poahsoan wet oh iei me kemwekid pen wekidekla pwukat pahn doke.

Ire tikitik 2 kasalehda me kamwomwadahn wekidekla ieu ong Poahsoan wet pahn kamanaman sang Aramas ni usuhs lap de usuhs tohrohr ahpw soangen usuhs wet pahn wiawi sohte tohto sang rahn weneisek (60) mwurin kamwomwadahn wekideklao eh soandier oh usuhspe kaker wiawi, oh wekidekla ieu pahn manamanla ma e alehdi percent limeisek-ehu (51%) en tohn usuhs manaman.

Ire tikitik 3 kasalehda me mwurin sounpar eisek (10) koaros, mwurin manamanlahn Poahsoan wet, petehk sapahl ong Poahsoan wet pahn kin pwurohng wiawi (Constitutional Review), pwehn diarada ma ekonehng en mie wekidekla de koasoan-sapahl ehu en wiawi de soh. Kahrepen apahn mie koasoan-sapahl de petehk-sapahk, pwehn kak kiong dien aramas en ahnsouo ma Poahsoan en Kosonned wet konehng arail mour nin duwen wekideklahn arail mwehi. Kosonned pahn kokouda sang Pwihn en Kawada Kosonned me pahn tehk duwen wiepen apwalih doadoahk me pahn pid wekidekla de koasoan-sapahl wet, me pahn duwete wiepe kan me sansal pahn ire tikitik 1, 2 oh 5 en ire laud wet.

IRE LAUD ME PID "DUWEN DOULAHNG NAN GOVERNMENT KAPW" (14)

Ire laud wet pid duwen doulahng nan Government kapw de kieweklahn mwehi, koasoanehdi oh kaweidada wiepe pwung oh konehng kemwekid dahn manaman oh pwukoah sang Government pahn Charter ong koasoandi en Government pahn Poahsoan en Kosonned wet. Iei ire laud wet me wia piris me pahn kadokepene mwein pahn Charter Government ong Poahsoan en Kosonned wet, pwe en kak mwekid wei ni soanamwahu oh meleilei. Ire tikitik kan me sansal pahiei koasoandi kan me kapedelongehr nan Mwolen Kou Poahsoan oh passer ni wadawad keieu.

Ire tikitik 1 kose me kosonned kan koaros me kekeudahr oh wie manaman pahn Charter Government me sohte uhong Poahsoan en Kosonned wet, pahn wie manaman lao mererail pein sohrala, wekidekla, welialihda de kasohrala. Koasoandi duwehte met kin kalapw wiawi pwe en kak apwalih Government kekeuda kapwo.

Ire tikitik 2 koasoanehdi oh dore pwungin inou (contract rights) me wie manaman pahn menen Charter Government. Inou ieu me Government en Wein Sokehs pidada ong contract de project ehu nanpwungen tohn wehi men oh Government en Wein Sokehs, de nanpwungen Chief Magistrate oh Pohnpei State Government, menerail pahn wia manamante lao menerail pein sohrala.

Ire tikitik 3 kiong Government en Wein Sokehs pahn Poahsoan en Kosonned wet manaman en ahngedo oh ahnekihla dipwisou, sahpw oh

sohng teikan me en Municipal Government pahn Charter Government.
Kemwekid pen sahpw de dipwisou me pahn wiawi sang Government en
Wein Sokehs oh Government en Weipokon en Pohnpei pahn Poahsoan en
Kosonned wet pahn koasoandi sang kosonned de pil wiawi ni pwungpene
ieu nan pwungen me pahn pangala dipwisou de sahpw, oh Government
en Wein Sokehs pahn ale kaweid oh kamanaman en Pwihn en Kawada
Kosonned en Wein Sokehs.

Ire tikitik 4 koasoanehdi me ni ahnsou me Poahsoan en Kosonned wet
pahn tepida manaman, Chief Magistrate oh tohn Pwihn en Kawada
Kosonned koaros pahn menen Charter Government pahn peupeusehlate
arail pwukoah kan oh wia soun doadoahk. Keieu pahn menen Poahsoan en
Kosonned wet. Soun doadoahk me sansal nan ire tikitik wet wehwehki
tohn Pwihn en Kawada Kosonned oh Chief Magistrate. Ienge de
koasoandi wet kohsang ni petehk oh tenek en wiawi iong ire wet oh e
sansal me e konehng mehlel usuhs lap ong tohn Pwihn en Kawada Kosonned
oh Chief Magistrate en kapwandala oh iangete usuhs lap en Weipokon en
Pohnpei me koasoandi ong en wiawi ni November, 1987. Epil sansal me
dien ahnsoun doadoahk en Chief Magistrate oh tohn Pwihn en Kawada
Kosonned pahn menen Charter Government pahn imwsekla ni July en pahr
1986. Pwehki kasohtik sent eh wia ire kesempwal ong petehk pen usuhs,
ihme karehda epahn soanamwahu pepeuhslahn pwukoah oh tohn doadoahk kan
pahn menen Charter en kolkolla lel nan pahr 1987. Nan irair en
ahnsou me Poahsoan en Kosonned wet pahn manamanla lel pahr 1987 pahn
pahr riau samwa. Nan irair en keimwseklahn mwehi wet, soahng kan me
anahnepe en koasoandi en wiawihla mwohn usuhs en pahr 1987. Ma tehnda
ehu pahn mie nan irair en ahnsou wet, ah tehnda wet pahn audaudda

nin duwen me koasoandi nan Poahsoan en Kosonned wet.

Ire tikitik 5 kasalehda me nan irair en rahn epwiki-rieisek (120) mwurin kamanamanlahn Poahsoan en Kosonned wet, Pwihn en Kawada Kosonned pahn kawada kosonned me pahn koasoanehdi oh idiada kousapw akan me pahn patpene pwehn wia ehu lopidi en usuhs oh tohtohn weliepe kan ong nan ehu ehu lopidi en usuhs. Tohtohn weliepe kan udahn pahn idawehn de poahsoanda sang tohtohn towe mehleh en ehu ehu lopidi kan. Ire tikitik wet pil kose me ni ahnsou me koasoansapahl wet apahn wiawi, oh ma e dierekda me sehr kei tehnda oh anahne en audaudda, ah usuhs tohrohr ehu pahn wiawi sang ni menen ire tikitik wet, sohte pwandasang rahn silihsek (30) mwurin kamanamanlahn kosonned me kawada usuhs. Ire tikitik 5 me tepin koasoandi nan Poahsoan wet kasohralahr, oh iei ire tikitik kapw wet me kapedelong nin duwen inengin Mwolen Kou Poahsoan ah wekidalahr.

Ire tikitik 6 kawehwehda me keieun usuhs en weliepen Pwihn en Kawada Kosonned oh Chief Magistrate pahn Poahsoan en Kosonned wet pahn wiawi ni Are Keriau en wihk en November, 1987. Kahrepe kan oh kesempwal pen rahn en usuhs wet ah kapwandala lel ni November 1987, sansalehr nan report pahn ire tikitik 4 en ire laud wet.

Ire tikitik 7 koasoanehdi Mwolen Kopwung en Wein Sokehs me rahnwet wie doadoahk oh manaman pahn menen Charter oh Judiciary Act en pahr 1982, me kokouda sang Legislature en Wein Pohnpei. Ni ahnsou me Poahsoan en Kosonned wet pahn manamanla, Palien Kopwung wet oh eh pwukoah kan en pepeuslahte. Ire tikitik wet pil koasoanehdi wiepen doadoahk (rules of procedures) oh soangen koasoandi me konehng teikan ni eh pahn ehukiong

Mwolen Kopwung Ileile en Weipokon en Pohnpei, pwe pwungpene en kak sansal ong soangen pwukoah oh manaman me konehng kesepwildo nan Mwolen Kopwung en Wein Sokehs pahn Poahsoan en Kosonned wet. Koasoandi oh kemwekid kan koaros me pahn wiawihda de kaunopda nan pwungen pali riau wet pahn soandi ni ahnsou ehu me pahn mwadang oh konehng pwe Mwolen Kopwung wet en kak doadoahk.


PEKIPEK (Recommendation) kan Sang Committee en Style:

1. Me lepin mahsen kan en wai me rasong "Government, Taxes, Committee oh Candidate" pahn doadoahngki spell en wai pwehn doadoahk nan Poahsoan wet ahpw sohte wekidala wehweh nin duwen mahsen en wai. ALAHLDAHR June 26, 1985
2. Me mahsen me pahn doadoahk ni pwallap nanpwungen Wein Sokehs oh Wein Nett sohte pahn iangahki Kolonia Town. ALAHLDAHR June 26, 1985
3. Me ehu ire tikitik kapw pahn kapedelong pahn Ire Laud 9 oh met pahn wia ire tikitik kapw 3, me pahn koasoanehdi inoun doadoahngki oh kapedohi mwohni en Weipokon. ALAHLDAHR June 26, 1985
4. Me ehu ire tikitik kapw pahn kapedelong pahn Ire Laud 10 oh met pahn wia ire tikitik kapw 1, me pahn koasoanehdi ohpis ehu me pahn apwalih sapwen weipokon en Wein Sokehs. ALAHLDAHR June 26, 1985
5. Me ire tikitik 1 en Ire Laud 12 pahn kasohrala pwehki ineng en ire tikitik wet sansalehr nan report en Ire Laud 1, me pid Manaman Lap. ALAHLDAHR June 26, 1985
6. Ire Laud 12, ire tikitik 4, en kasohrala pwehki ire tikitik 7 en Ire laud 12 apwalihlahr ineng en ire wet. ALAHLDAHR June 26, 1985
7. Me Ire Laud 11, ire tikitik 3 me pahn doadoahk nan Poahsoan wet pwehki iei ineng en pali ngeder en aramas en Wein Sokehs me alahdi ni ahnsou me kasikuhl en Poahsoan wet ah wiawi ong aramas akan. Met karedahr ire teieu me sansal nan Ire Laud 11, me pid Tiahk. ALAHLDAHR June 26, 1985
8. Me pid Ire Laud 7, nan tepin kamwomwadahn Poahsoan wet me pass wadawad keieu, me pid pwukoahn Government en kasohrala, pwehki ah sansalehr nan ire teikan pahn Ire Laud 6, (Palien Kawada Kosonned), Ire Laud 7 (Palien Kakahlaka Kosonned) oh Ire Laud 8 (Palien Kopwung). ALAHLDAHR June 26, 1985
9. Me Ire Laud 7, ire tikitik 6 me pid Idihddahn Soun Doadoahk kan en alehda keimuseklahn (sentence) mahsen kan, pwehn kak sansal wiepe kan. ALAHLDAHR June 26, 1985


10. Me ire Laud 6 en ire tikitik 5 (b), me pid pilipildahn Opsih
kan oh Mwekid en wei-kupwur, en alahlda ni unsek, keimuseklahn
(sentence) mahsen kan koaros, pwehn kasalehda wiepen usuhs rir
oh audepen tiepene kan. ALAHLDAHR June 27, 1985
11. Me Ire Laud 7, ire tikitik 2 me pid Kak en Wiala Chief
Magistrate, keimuseklahn (sentence) en alahlda, pwehn kasalehda
me Chief Magistrate sohte kak alehdi ehu pwukoah doadoahk
poatoapat likin ah pwukoah. ALAHLDAHR June 27, 1985

Omwi Committee patowan song uwen ah tungol kak en kaunopada
Kamwomwada en Poahsoan ehu me pahn sansal oh wehwehiong aramas
koaros. Omwi Committee ahnsou wet peki ni Mwomwohd unsek en
Kou Poahsoan en Kosonned en Wein Sokehs en pass ni wadawad
keriau Kamwomwadahn Poahsoan nin duwen ah wekideklahr.


Ni wahu, kapedelong sang Committee en TEHK PWUNGIN MAHSEN OH
SOANDI EN MAHSEN (STYLE).


Chairman, Del. Felciano Perman


Vice Chairman, Del. Pedro Harris



Member, Del. Hilary Conrad


Member, Del. Kusto Lieman



Member, Del. Rensper Liwy



Member, Del. Largo Edwin


Member, Del. Dakio Syne


Member, Del. Alterino Rosario

DO NOT CONCUR


Member, Del. Abraham Doses


Member, De l. Annes Liebén